

առաջ բաց է արել մեր հայրենի աշխարհի եւ նրա ժողովուրդի բնական եւ հոգեւոր գանձերը, սէր ու հետաքրքրութիւն է զարթեցրել նրանց մէջ: Արովկան մինչեւ իսկ իր ժողոված, անձամբ գրի առած բազմաթիւ նիւթերն ու տեղեկութիւնները դրել է այդ եւրոպացիների տըրամադրութեան տակ, որոնք եւ զիտցել են մեծ չափերով ու լաւագոյն կերպով օգտագործել նրանց:

Համարձակ կարելի է ասել, որ մի Վազնէ-րի ու Աբրիխի, մի Բոտէնչտէզտի ու Հաքստհաուզէնի, ինչպէս նաեւ ուրիշ ոմանց աշխատութիւնները շատ բանով թերի պիտի լինէին, պիտի զգալիօրէն կորցնէին իրենց գիտական արժէքը, եթէ Արովկան անմիջական մասնակցութիւն ցոյց տուած չլինէր՝ նիւթեր մատակարարելով նրանց: Եւ պէտք է ասել, որ այդ եւրոպացիները իրենք է, զոնէ շատերը նրանցից, որ հրապարակաւ խոստովանում են այդ: Ահա այդ տեսակէտից եւս հոյակապ է եղել մեր նոր գրականութեան հօր նշանակութիւնը: Մի բան սակայն, որ յաճախ է մոռացութեան արւում:

Յիշածս եւրոպացի ճամբորդների շարքում մի առանձնայատուկ տեղ է զբաւում գերման Հաֆստհաուզէնը իր գործով: Մասնակի է նաեւ այն ծառայութիւնը, որ մատուցել է այդ գործին Խաչատուր Արովեան: Խնդիրն այն է, որ Հաքստհաուզէն որպէս իր ժամանակի տնտեսական-ընկերային հարցերի մասնագէտ, այդ առաջադրութեամբ էլ Անդրկովկաս եւ Հայաստան է ճամբորդում: Առաւելապէս նման հարցերն են, որ կազմում են Հաքստհաուզէնի աշխատութեան նիւթը: Եւ հէնց նրա համար էլ ուշագրաւ է այդ աշխատութիւնը մեզ համար, որ եզակի է իր տեսակում:

Հայ լեզուն ու պատմութիւնը, ինչպէս եւ Հայաստանի բնութիւնն ու աշխարհագրութիւնը մէկէ աւելի օտարների եւ մանաւանդ մերայինների հետաքրքրութեան եւ ուսումնասիրութեան առարկայ են դարձած հին ու նոր անցեալում: Իսկ մենք դժուար թէ ցոյց տանք Հաքստհաուզէնից դուրս ուրիշ մէկը, որ մեզնից 80 եւ աւելի տարիներ առաջ Հայաստանի եւ հայ ժողովուրդի ներքին-ընկերային կեանքը իր բազմազան կողմերով ուսումնասիրութեան առարկայ դարձրած լինէր: 19-րդ դարի առաջին կիսի հայ կեանքը է, իր բովանդակ կող-

մերով, որ հաւատարմօրէն արձանագրուած ենք տեսնում Հաքստհաուզէնի գործի մէջ:

Մենք շարունակ գանգատում ենք այն մասին, թէ անցած-գնացած դարերի մեր մատենագիրները, մեր պատմագիրները գոհացել են առաւելապէս եկեղեցական ու քաղաքական դէպքերի արձանագրութեամբ եւ նկարագրութեամբ: Մենք դժգոհում ենք, որ նրանք մեզ չա՛տ, չա՛տ քիչ բան են հաղորդում այն մասին, թէ իրենց նկարագրած դարաշրջանում ի՛նչպէս էր ապրում հայ ժողովուրդը ինքն իր մէջ, հասարակական-ընկերային ի՛նչ պայմաններ էին իրենց դրոշմը դնում նրա կենցաղավարութեան վրայ: Կարճ՝ թէ մենք չափազանց քիչ բան գիտենք հայութեան ներքին կեանքի մասին՝ անցեալում:

Թէեւ չափազանցուած, բայց եւ այնպէս ճշմարտութեան համապատասխանում է այս տարածուած կարծիքը: Իսկ արդե՞օք շատ բախտաւոր պիտի սեպենք մենք մեզ, եթէ նոյն հարցերին նոյնպիսի չափանիշով մօտենալու լինինք՝ նո՛ր ժամանակների վերաբերմամբ: Դժուար թէ: Այստեղ դարձեալ օտարներն են մեզ օգնութեան հասնողը:

Անկարելի է մատնանշել հայերէն լեզուով գրուած մի հրատարակութիւն, որ մեզ հանգամանօրէն տեղեկացնէր այն մասին, թէ 19-րդ դարի երեսնական եւ քառասնական թուականներին, երբ Արեւելեան Հայաստանը նոր էր մտել ուսուսական տիրապետութեան տակ, ի՛նչ պատկեր էր ներկայացնում նրա ներքին-ընկերային կեանքը:

Ահա այդ գործն է, որ կատարել է մի Հաքստհաուզէն: Դրա համար էլ է, որ մենք այդ գործը իր տեսակում եզակի անուանեցինք: Եզակի ոչ միայն այն տեսակէտից, որ Հաքստհաուզէնի եւ նրա չափերով ժամանակակից մի ուրիշը — ոչ հայ, ոչ էլ եւրոպացի կամ ուսուսչէ կատարել այդպիսի մի աշխատանք, որով եւ նա մեզ համար նաեւ առանձնապէս թանկագին աղբիւր է հանդիսանում, այլ եւ այն տեսակէտից, որ եթէ այդ աշխատանքը ճիշդ ժամանակին չանէր Հաքստհաուզէն, յետոյ՝ թէկուզ մէկ-երկու տասնամեակներ անց՝ անկարելի պիտի դառնար նրա իրագործումը ցանկալի ձեւով ու չափով: